

Aruba a haci un bon impresion durante “workshop” na Trinidad & Tobago

Lo tene campaña nacional di conscientisacion riba traficacion y contrabanda di hende

Miembronan di Taskforce contra Traficacion y Contrabanda di Hende di Aruba (TMMA) a participa na un tayer organisa pa Organisacion Internacional di Migracion (IOM), na Trinidad & Tobago riba dianan 9 y 10 di april 2014. E “workshop” a trata con pa “Mehora esfuerzonan pa traha na conscientisacion di nos hendenan tocante traficacion y contrabanda di hende”.

Di e “Taskforce contra Traficacion y Contrabanda di Hende Aruba” a participa Jeannette Richardson-Baars, coordinador nacional y Presidente di e Taskforce Aruba, Glenda Gil, miembro di Taskforce Aruba y Presidente di e grupo di trabou di informacion y conscientisacion di e Taskforce Aruba, Lori Simmons y Ruthlyn Lindor, miembronan di e Taskforce Aruba y alabes miembronan di grupo di trabou di informacion

y conscientisacion di e Taskforce Aruba.

Paisnan cu a participa na e workshop tabata Antigua y Barbuda, Aruba, Corsou, Jamaica, St. Vincent & the Grenadines y Trinidad & Tobago. Representante di e Organisacion Internacional di Migracion na Trinidad, Chissey Mueller, e Embahador di Estados Unidos (UN) na Trinidad y un Representante di e pais anfitrión Trinidad & Tobago, a inaugura e workshop. Cada pais a trece con a traha y con ta bay traha na duna informacion, educacion y conscientisa nan poblacion encuan to traficacion di hende. A haya presentacion di con por uza metodonan popular manera teatro, musica, canto, poema y radio pa conscientisa nos pueblo tocante traficacion di hende y tambe pa haci esaki saliendo di e cultura di cada comunidad. E Representante di e Organ-

izacion Internacional di Migracion (IOM) a duna un splicacion tocante campananan di conscientisacion, kico un campaña asina por logra, con scoge e grupo cu bo kier conscientisa, con pa uza e medionan apropiada y adecuado, con pa evalua e impacto y resultadonan di e campaña di informacion.

Na final cada pais presente mes ter a traha un plan di informacion, present’e y a haya reaccion di otro paisnan. Tambe a keda proponi pa tin un coordinador regional pa por sigui mantene e contactonan entre e paisnan y informa otro di e diferente eventonan cu tin na e diferente paisnan.

Diaranson anochi ta tin un recepcion cu un concierto clasico di e facultad di musiconan di Universidad di Trinidad, cual tabata masha bunita mes. Diahuebs atardi e delegacion di Aruba y di Corsou a cera



conoci y introduci nan mes na e Embahador di Hulanda na Trinidad & Tobago, esta Lucita Moeniralam.

E delegacion di Taskforce Aruba a representa Aruba dignamente y profesionalmente y a regresa satisfecho y mas inspira pa sigui cu e trabou di informa, educa y conscientisa nos hendenan di e problema mundial aki, esta Traficacion y Contrabanda di Hende, cu tambe ta tumando luga na Aruba.

Si bo grupo, bo persona ta desea di haya un presentacion di kico ta traficacion di hende, con por mira cu por ta trata trafica-

cion di hende, unda tin cu mira, kico pa haci ora bo ta sospecha algo, yama libremente na telefon 5848282, na Scol pa Polis, pa haci un cita. Gustosamente Taskforce contra Traficacion y Contrabanda di Hende Aruba ta dispuesto pa planea un dia pa por duna e presentacion na bo grupo.

Pa raporta un caso di traficacion, haya informacion of ayudo, por yama e ‘hotline’ pa cu traficacion di hende na celular 592 3231, unda un profesional di Bureau Slachtofferhulp lo atende bo mesora.